


伊
濱
集

四



詳校官庶吉士臣初喬齡

侍讀臣孫球覆勘

膳錄監生臣嵇承羣

膳錄監生臣吳壽康

欽定四庫全書

伊濱集卷十

元王沂撰

五言排律詩

舒獻軒為謝庭學賦十三韻

草屋何年築溪流幾許深
灌園歸濯足捫蝨細論心
漁父擎舟過村翁挾冊尋
古來真隱逸原不在山林
木客能沽酒淵魚解聽琴
焚香清玉案採藥白雲岑
晚圃菰栽綺春籬筍脫簪
高情終的的逸足自駸駸
蛺蝶依芳

草蜻蜓下碧潯悠然觀物化政爾忘年侵得意同濠上
忘機老漢陰自書高士傳閒和散人吟何必蘇門嘯風
泉有好音

送陳雲嶠太祝

孝理嚴周監宏摹軼漢儀舞先陳羽戚器敢闕尊彝犧
象形模在雲雷刻畫奇星占使者動工考聖人為魏國
佳公子孤標照等夷春衫裁白苧醉墨灑烏絲重過鳴
珂里依然洗玉池祠官從昔重歸騎不應遲紀瑞催麟

筆色鋒敝虎皮禮成無墜典神醉答繁釐太液千年鵠
齊房五色芝散材遺世用猶解薦歌詩

詠天妃廟馬援銅鼓

南海天妃廟今存馬援銅大音猶戰鼓餘韻或疑鐘世
駭流傳舊人推鑄冶工蟾蜍圓頂列翡翠繡文重蹲踞
環旁峙周圍體下空響令羣隊進降見百蠻從一代經
營意千年戰伐功金湯全漢域銅柱界充封零落香烟
裏淒涼異代中海祠難獨立神物會當逢

寄南臺張雄飛

不見張都事詩名到處傳
齋房歌瑞草清廟奏朱絃
琢句嚴秦法揮毫染蜀箋
驄青明劍閣衣繡濕蠻烟
返照咸陽樹西風建業船
鳳臺天上客烏府幕中仙
櫟散吾甘老蓬飄子獨憐
驪駒王式傳白髮廣文羶
賴有巾醺酒初無易絕編
烏頭何日白馬首定誰圓
欲繼還山集猶堪面壁禪
寒燈搖遠夢殘歷卷流年
思逐南飛雁悠悠入楚天

題光孝寺

昔者虞翻苑今存大鑒燈法傳三世佛教演六朝僧祝
髮餘孤塔談經契上乘鑑懸明月滿樹聳上雲騰稽泚
知皈仰因時感廢興南宗更綿邈千載說盧能

送徐復初檢校浙省

畫省分僚重湖山待客來莫言江路永先見蠟梅開世
業歸清議明時得異材賦因鸚鵡著裘費鸛鷀裁粉署
文書少郎官宴賞陪蘇堤移彩舫葛嶺上丹臺逸翮何

妨遠神駒不待媒
明年青瑣闥佇聽玉珂回

和蘇伯脩授經筵進講詩韻

元統千齡運虞廷
六府脩奎躔環列宿虎觀奉宸旒雲
繞蓬萊仗春回太液流登瀛更寓直稽古贊謀猷共仰
天顏喜俄傳夕箭浮化興周禮樂技拙楚倡優雨露承
華蓋神仙望彩舟給符鳴玉佩賜燕設王羞青瑣歸應
晚雲臺議已酬史臣書盛典嘉應續陽秋

冬日同李仲善登慈恩塔

郭外慈恩塔晴登獨嘯歌雕簷撐漢立繡拱列星羅氣
蟄龍蛇窟陰森鳥雀柯東西旋日月表裏見山河語笑
空中應遊觀却後過錦川晴泛泛陽嶺秀峨峨文采諸
僧少名公一縣多天梯如可到從此振瓊珂

題李仲賢御史遠情亭

一斛冷冷水叢生裊裊荷仙人田種玉織女錦成梭縹
緲穿朱戶徘徊泛素波薰風吹不盡涼露洗還多準擬
修書傳依稀聽櫂歌初隨雲共去又與月相和寶鏡涵

光炯烟幢自蕩摩宿醒時為析佳客數相過爽氣金天
豁英姿多角我願言期歲晚君子意如何

古宮人怨

雉葆趨平樂鸞旗幸上林粧成陪玉輦舞罷墜瑤簪綵
剪迎春勝樓穿七夕針辟塵犀鎮幙結繡鳳盤衾慚鵠
來依沼因魚泣滿襟拊心顰可效掩鼻謗還侵螢度羅
帷影苔生玉砌陰昭陽雲渺渺長信月沉沉却為承恩
夢翻搖望幸心風簾疑仗影曙鼓悞車音笥有題詩扇

囊無買賦金香憐衣舊賜貌怯鏡重臨忽見龍池草春
來色自深

題象麓書院

坐對山如象逍遙風滿林野雲依古木澗水落危岑鸞
鵠翩然下靈祇肅有臨谷神端不死木客總能吟曉放
傳書鶴宵聆搗藥禽芝田耕白鹿丹鼎化黃金理要同
根極塵寰自古今昔賢談大道而有會余心欲往從遐
躅蒼蒼烟霧深

伊闕道中紀事

伊闕春先去河堤日又斜
青林明宿鷺白水拂鳴蛙
歲月供詩筆關山寄馬樞
物情齊木鴈世味識梨查
柳老蟲書葉溝晴鳥篆沙
錦衣翻稚竹粉淚墮危葩
客袂空寒食歸期定削瓜
夢驚蕉底鹿愁怕酒中蛇
寂寞先賢墓悲涼故相家
鳳凰鳴久絕鷓鴣事空誇
訪古心猶渴懷人思未涯
青衫壯夫淚不是聽琵琶

送洪萬戶歸麟州

天馬三韓牧麟州獨請纓車書周制度帶礪漢同盟鴨
綠江頭戍鷄林海外城神仙餘氣色草木識威名甲地
烏衣舊賢郎秀骨清名藩常特顧魏闕自含情祖帳傾
冠蓋前驅植旆旌秋風正搖落為賦赤霄行

劉氏孝行詩

盛族金刀裔荒阡又幾春草長迷馬鬣松老卧龍鱗種
德由來遠承家定有人山烟開莽蒼石筍露嶙峋欲祭
烏先集同羣鹿自馴繫牲碑有待下馬客來頻通籍金

門貴羅階玉樹新清時崇孝理風俗坐還淳

送趙繼清推官潮州

昔宋南遷日更生望獨尊漢庭多側目湘水竟招魂遺
廟榕陰古孤城海氣昏百年悲故老昭代見聞孫董澤
新封殖潮陽又拜恩公侯終必復風義凜猶存北闕聲
名久南圖羽翮騫理官應暫屈經術要重論梅發連溪
白瀧流觸石喧欲歌神燕喜先要獄平反碧漾椰漿美
丹明荔子繁懸知閑木索時為薦蘋蘩

秋堂為劉會宗御史賦

燕處何瀟灑堂堂定幾弓秋光今日好州望古來雄歷
架多黃卷傳家有素風使君熊畫軾御史馬乘驄鎮幕
犀紋黑堆窻柿葉紅露凝金掌迥水瑩玉壺空草綠垂
書帶香清長桂叢何時德星聚南望思無窮

送陳彥和院判

祠官嚴漢廟孝理洽虞廷皇眷雖云渥臣心自不寧星
辰天上直松栢夢中青詔許辭丹陛客嗟聳縉緹賜金